
Хушхабар: “Зафаробод” ММТП ҳудудида ғалла режаси вилоятда биринчи бўлиб бажарилди

Бағдод туманидаги “Зафаробод” муқобил машина-трактор парки ҳудудида давлатга дон сотиш шартномавий режаси вилоятда биринчи бўлиб бажарилди. Бу ҳақда ғалла ўрими мувофиқлаштирувчи ишчи гуруҳ раҳбари ўринбосари Шухратжон Дехқонов маълум қилмоқда.

ММТП таркибида 24 та фермер хўжалиги тасарруфидаги экин ер майдонларининг 971 гектар қисмида ғалла етиштирилган бўлиб, 2 минг 501 тонна ҳосил олиниши белгиланган эди. Бугун, 14 июнь ҳолатига (соат 11:00), бу кўрсаткич 2 минг 632 тоннани ташкил этмоқда.

- Таркибимиздаги 22 та фермер хўжалигида ғалла ўрими яқунланган бўлса, уларнинг барчасида режа ортиғи билан бажарилди. Яна 2 та фермер даласида ўрим давом этмоқда. Ҳали 100 гектардан ортиқ ўрилмаган майдонимиз бор. Насиб қилса, жами ҳосилни 3 минг тоннага етказмоқчимиз, - дейди “Зафаробод” ММТП раиси Комилжон Худойбергандов.

Раиснинг маълум қилишича, “Мажнунтол ифори”, “Маъмур ота”, “Темур Малик”, “Уч-уй шунқорлари” каби фермер хўжаликларида ўртача ҳосилдорлик 40 центнердан зиёдроқни ташкил этган. Марказий Фарғона чўллари учун бу кўрсаткич анчайин ижобий ҳисобланади, бироқ, шундай бўлса-да, экин ерларининг мелиоратив ҳолатини яхшилаш бўйича белгиланган вазифалар босқичма-босқич давом эттирилмоқда.

Бағдод тумани ҳокими Восилжон Назаров кеча “Зафаробод” ММТП раиси Комилжон Худойбергандовни эришилган меҳнат ғалабаси билан самимий қутлаб, миллий урф-одатларимизга биноан, унинг эгнига тўн ёпди.

Бағдод тумани ҳокимлиги Ахборот хизмати.

2021-06-14 16:41:44